

Gjer eit historisk kupp, kommunar!

Frå nettsida til Fosen historielag og gjennom samtalar med redaktøren har eg under vefs vorte orientert om arbeidet med Fosens historie bind 2. Her er det mykje interessant og til dels heilt nytt regional- og lokalhistorisk stoff som kjem fram. Det har vore ein oppglødd redaktør eg har snakka med mange gonger.

Eg har fått med meg at nokre av kommunane gir økonomisk støtte til arbeidet med dette historieverket, slik Fosen historielag har søkt om. Da er det leitt å høre at ikkje alle kommunane i det gamle Fosen går inn med bidrag til finansiering som gjer det mulig for historielaget å få gitt ut dette bind 2 av Fosens historie. No bør heile regionen vår stille opp og vera med på det beskjedne bidraget Fosen historielag har bedt om.

Her blir kommunane inviterte til å gjera eit lokalhistorisk kupp. For nokre ti-tusen kroner får dei ei solid regionhistorie, som vil løfte lokalhistoria i heile området vårt. Om kvar av kommunane skulle laga si eiga samfunns- og kulturhistorie, ville det det koste dei 20–30 gonger meir enn det dei her blir bedt om.

Så ikkje nøl no, kommunar. Slå til! Betre kjøp får de garantert ikkje.

Svein Bertil Sæther,
pensionert museumsdirektør,
Hitra